

四庫全書

集部

欽定四庫全書

集部
陵川集卷三十七

詳校官中書臣孫溶

主事臣呂雲棟覆勘

總校官編修臣王燕緒

校對官編修汪鏞

謄錄監生臣陳韶

欽定四庫全書

陵川集卷三十七

使宋文移

宿州與宋國三省樞密院書

元 郝經 撰

大蒙古國信使翰林侍讀學士郝經等謹再拜奉書於
宋國三省樞密使相國公閣下經等欽奉聖旨賡擎國
書前往宋國告登寶位仍布弭兵息民意比及啟行即

還江上兵告諭沿邊萬戶俾各守故屯撤去哨騎不得
挑亂生事令山東淮南行省李公遣劉仙等二人入楚
州通報而無來音又令漣州總帥移公文會問云不知
所在五月十五日經等一行至邊於是再發關移自漣
州入楚州以復前事仍請入國日期至今不報以節次
靄昧至於差池不能明主上盛意改途捷出駐劄蘄陽
今副使劉人傑叅議高翹親往計議敢布腹心於閣下
竊聞明月之珠夜光之璧以暗投人則必按劍無因而

至前也疾雷破山烈風震海而不懼安於故常也故無
因而至者應之而不失安於常者而知其變惟知者能
之天下之事幾而已矣顧乘而處之者何如也變故方
殷幾會鼎至乘之而不失則無因而至者不疑安於故
常者而知懼處得其當天下無事而生民被其澤不能
乘而失之則無因而至者而為之疑安於故常者而不
知變以至變故紛拂不可救藥而天下被其毒蓋天下
之勢治亂相尋禍釁相紐其幾無窮而變故亦無窮乘

而處之者宜重慎而審之也天下之大亂必出於大治
天下之至危必出於至安天下之大憂虞必出於無虞
戰之負出於勝事之失出於得惟其忽而不審執而自
蔽不知倚伏之幾安於常而不知變是以至於是而不
能復一日雖悔而莫之追也國家光有天下五十餘年
其用兵於江淮者幾三十年兵勢之振莫甚今日取東
海下巴蜀平大理圖武昌克漣水穿徹二廣至於湖湘
縱兵長驅幾至吳會有一天下之勢鴻毛衡風似有所

不足舉而一旦斂兵而退又先之以信使是無因而至
前也其飄忽振蕩騰擲宇宙忽去忽來往年之常而彼
國亦以為常其中有非常者而不知是安於故常也無
因而至而弗之信安於常者而以為常是忽而不乘過
計而不審閣下必不之知也無因而至者果無因乎進
退之常果如常乎幾會之來所繫甚大不可因仍苟且
執於一偏而泥於虛文以為我國情狀不可測擯而不
以信義待是幾一失而暴國之禍復起矣當國者宜重

慎而審之也今日斂江上之兵先輸平之使豈師旅不
及曩時歟將帥不及曩時歟甲兵車騎不及曩時歟五
十年之儲蓄不能一朝用歟土地加於舊而賦力倍於
前聯西海者五十萬控東陲者三十萬自大理至於漣
海帶甲百萬兵力崛阜莫之與京無故而斂兵無故而
先信使此無他主上如天之仁曠世之義也往歲主上
在潛邸時先皇帝畀以東師俾之東出比師之行其舊
獲俘囚如張都統輩及所在拘繫間探人等皆縱歸之

渡淮而南諸山堡砦所得生口皆撫而安之而去下不
殺之令使宣撫楊惟中出先前茅布宣恩信及其渡江
如潁黃洲青山磯市初未嘗戮一人至於武昌先遣王
一清開喻而彼守臣執而殺之又射殺一肺腑大官於
是始下令具攻具以為肉薄骨并殺人盈城實非本心
故雖合長圍而攻之不急也若彼國當時不殺信使少
加以禮可退師成盟經等侍從左右聖意仁隱好生惡
殺實所具知大官元臣請長驅入臨安主上以為江南

治平三百餘年其民物繁夥居室櫛比吾若徑往則皆
躡藉矣生靈何辜而吾若是是獨非吾民乎遂不往聞
先皇帝上僊乃置師而去乘傳北歸德澤既深天命攸
屬親王四十餘人及藩方侯伯會於開平共行推戴既
踐阼謂諸王近臣曰朕欲息兵安民久矣而弗克為今
在朕矣遂命河南經略使史公往江上詔諸軍各還故
屯命山東淮南行省李公於楚州通國信而命經等充
國信使副奉國書以往其書辭一依今國名分未定與

國平交例南北睽裂好聘不通五十餘年天誘其衷幸而集此而乃不報未知何如必以為如王楫矣王楫挾兩國而庇一身言于北則以為降使於南則以為和終於兩國交兵而身以之斃今則不然也以為三十年間佳兵毒民禮義不通使使先往欲崇禮義而弭兵兇也必以為如术速門譚浩矣术速門譚浩逢迎徼倖以不直之辭要難行之事貪于跋扈啓釁重怨以其不納歸而生事辱國而傷來使激萬乘之怒使之投袂而起連

兵數年屍骸委積魚肉生民長惡崇禍今則不然也以
為待人以禮而不以力服人以道而不以勢尊人而後
自尊安人而後已安先之以敬讓而不以爭導迎和氣
天必悔禍至治可期也是皆冀於曩時有為而為非無
因而至也且通好之利不在於北而在於南非惟今日
振古已然昔孫氏據有江東僅能立國稱臣於魏而乃
敢王殷浩桓溫連年北伐終至敗折宋高祖文帝屢為
大舉亦未嘗得志足以自敝王羲之謂江左立國賴萬

里長江畫而守護風寒之處不過數四大抵江北羈縻
而已此誠至論蓋江淮立國以之自守則僅足以之侵
伐則不宜故終之吳為晉平陳為隋平江陵為唐平往
事則亦已矣自宋有國以來西北二邊常為祖宗患寇
準與契丹定盟治平者百有餘年宣靖壞盟終以失國
高宗渡江善於處變俾秦檜以盟合神聖之子母歸二
帝之客樞治平者二十餘年孝宗尋盟治平者五十餘
年是其明效大驗閣下所熟復而日省者也孰利孰害

孰得孰失已事過往皆可為監無因而至可不察歟今
主上聖度優宏開白炳烺好儒術喜衣冠崇禮讓踐阼
之初以為創法立制非耆舊英賢則不可乃起宋子貞
於東平王文統於益都劉肅於彰德許衡於覃懷其餘
茂異特達弓旌相望使之論定統體張布網維以為善
治必當偃兵如金源大定之初則可矣故特用經等不
以蒙古回鶻參注其將發命會諸王大臣於齊宮蠲日
告天以明誠心令經等乘驛速往軍回使入信國家明

信使麾遣出莫不顙顙以為至治之君開兩國之泰也
地廣兵雄戰盛攻取乃能遽爾霽威宿銳屈已伸義先
人以禮是曠世之幾不可失也何乃再為通信邈然不
報且彼國邇年以來兩淮殘破四川陷沒二廣透漏江
面綻缺如開達夔門施黔邕桂巖險之阨塞沿江上下
羊羅采石舟師之出沒通泰而下新河料角海道之徑
捷我之師徒將帥莫不悉知昔以為憚而今不以為憚
曩以為難而今不以為難上流在所可以下江面在所

可以渡幹腹在所可以出如秋高馬肥再為之舉兵覺
一動未可卒解三百年之文物數十世之累積可為憂
已若剷去疑阻以承天休弭兵息民申畫疆理通天下
之一氣合南北之太和蘇潤瘡痍補葺傾敗舒釋靈長
締結歡悅明月夜光實為彼國之寶安於夏屋破山之
雷振海之風不作摯倚伏之幾置泰山四維三代可以
四歷年可以過漢而不止於唐閣下亦與先正比隆而
與享安寧之福矣如信矯誣身而不國以負為勝以危

為安以有事為無事以誠為詐以變為常先來之使為
可疑諸軍之回為不武北方遂可玩南方真可強異日
必有任其責者故是行也非為我國蓋為彼國非為我
生靈蓋為彼生靈不宜疑貳遷延牽於多議利害明白
一言而決矣尤無以退師為不武而無意於取也彼之
將帥多崇飾虛名以徵爵賞初以復讎攻蔡金源氏滅
我師北還又以收復兩京灑掃山陵而犯河南遂敗盟
約使江淮之民塗炭至今崇虛名而受實禍利歸將帥

禍及生靈茅土相聯節鉞相望而遺民安在抑可哀已
今師之退又必自以為功而以我無意於取而無能為
也昔國家破金師於澮河遂斂兵而去金人以為無意
於取中興可期恬不為慮既滅西夏平西域旋旆東指
一舉而取之今之師還使入果無意乎倚伏之幾不可
不察也崇明信昭大義乘時挈會安民而固社稷成不
世之盛事揆鴻烈於無窮挽回元氣春動山河離析分
崩幽厄憔悴盡為改色可不為乎經等不佞敢肆騰口

說張布鼓於雷門蓋疆理限越區區茅塞不能縷悉故
罄竭狂斐冒於一言惟閣下孚照暑勇方盛萬望永綏
鈞履膺受厚福不宣

宿州再與三省樞密院書

大蒙古國信使翰林侍讀學士郝經等再拜奉書於宋
國三省樞密使相國公閣下經等欽奉聖旨賫擎國書
入宋國告登寶位仍布弭兵息民意自四月終至邊漣
楚上下累移文牒至於宿州又具書縷悉寂無來音禮

部郎中劉人傑親往計議亦不為報使居河麋露宿芟
舍甚非所以待使人之意我以禮義奉辭而往而彼擯
蔑鄙外一不以禮義荅古者兵交使在其間今退師輸
平隋讎崇好不審高明何故之以而為若是昔楚晉列
國欲弭兵而安諸侯猶兩釋纍囚鍾儀如楚荀偃如晉
各使求成矧於堂堂兩朝麇兵聯戰久無期日今日之
事幸而集此方之晉楚不既大矣乎而乃不報如石投
水如矢搭地蘊蓄疑慮必有所在以僕規測殆無藏覆

特遷怒重怨欲為子子報復之計夫搖蕩疆場撐裂藩垣荼毒生靈互為吞噬皆已事既往於今日何有使麾臨境拒而不納漫為關塞使得以窺為國淺深而示人以不廣僕等非汲汲求入亦非貪仕冒進徒為口說者以為兩國暴骨幾三十年遺黎殘姓殆欲殲盡上天悔禍主上踐阼首用僕等畀以和議康濟瘡痍於是振衣束髮慨然啟行副使何道寧本臨安人既入我朝著道士服主上在潛邸時即以議和為請主上許之曰俟一

日當行既踐阼遂命與僕偕行僕等若知其不可亦非
妄行者近朝廷聞猶未入境有詔北還且言秋高馬肥
當整六師載為南伐僕即上章以為劉君等既入必不
可行而後旋旆蓋以朝廷初發二使一入高麗一入宋
國使高麗者未入其境而使者兩輦繼至項背相望一
賀登寶位一請復故疆主上嘉之而許其請且於北京
遼東搜括高麗人戶送還本國於是高麗遣子入侍僕
等自離輦轂幾踰三月未見次第已被責問區區之心

以為此幾一失邊釁復動兵連禍結何時而已寧負稽
緩罪戾堅為之待庶幾有成明主上之意活兩國之人
雖斥逐戮辱死且無恨僕等久聞高議是其利害白日
正中不必蓋覆牽於多議奉天子之恩命而久於河上
盤桓而不進豈為僕等之辱亦閣下之所惡不免喋喋
再為具此以重干瀆秋暑未艾萬望惠綏鈞履膺受厚
福不宣

與宋國兩淮制置使書

經頓首再拜啓邇者欽承朝命猥備行人荷仁綸奉信
函乘驛而至境上疆場之吏不時達於是駐泊於五河
朱秦二君至云執事開聞而國信始達且揄揚高議於
是願見之心益切以為鍤鍤之金聲炳炳之玉光輝映
蕩洞者有日乃今舍舟而騎蹈陸去水徑移儀真天嗇
厥幸而莫之見也雖然義同氣合則楚越肝膽背馳殊
趣則對面九疑胃中之所茹塞將以俎豆於左右者敢
自靳乎嘗以為士之為學期於有用不區區於浮末天

之與已者大而已自小賦畀者皆有用而已自棄之也
夫道以用而見天地萬物皆是也其或無用則天地萬
物息人所以裁成輔相使天地萬物各盡其用而不使
之息者也生生而不窮化化而不已任重道遠而不斃
特立獨行而不搖巖巖自致不與草木腐而埃塵蜚為
有用之學待有用之幾行有用之事或遇或不遇或成
焉或否焉命與時不可期故有一時之用有一世之用
有萬世之用不虛生不妄為則建一時之事業建一世

之事業建萬世之事業事業雖殊而期于有用一也學而有用而終不遇則亦命焉耳矣學而無用與遇而不能以自用事幾去而功業隳失道左見安視天民之斃而莫之顧使天地萬物壞而俱不能以用可以為士乎哉僕始知為學則以是自淬厲憤悱以崛起嘗自誦曰不學無用學不讀非聖書不務邊幅事不作章句儒以為不屈則無以信不積則無以用乃束髮頓脰箝以益密索太極之蘊鑿混沌之竅閉關塞隊絕彼柔道進明

以晦續晝以夜求夫體以致夫用奪造化者有年而無
幾與時不可用也乃剗欲樹志削去世蔓累九鼎以不
移挽萬牛以不回以天下之至靜觀天下之至動必可
行可用也而後起今主上在潛開邸以待天下士徵車
絡繹賁光丘園訪以治道期於湯武歲乙卯下令來徵
乃慨然啓行以為兵亂四十餘年而孰能用士乎今日
能用士而能行中國之道則中國之主也士於此時而
不自用則吾民將膏鈇鉞糞土野其無子遺矣故主上

踐阼首有是舉即命僕以行將以彗積年之凶釁頓百萬之鋒銳存億兆之性命合三光五嶽之氣一四分五裂之心推九州四海之仁發萬世一時之機盡天地萬物無窮之用建天下後世無疆之事業以正人極以迓天休是以主上以是命僕而不疑僕亦受之而不辭四月維夏冒暑而南既至邊方為憤憤朱秦二君繼至聞執事開閭賈公為相乃指天而賀以為有用之學今真有用矣於是開露肝臆觸忌冒諱作為一書言當世事

達於賈公以其不報又繼以書及再為公移於執事非
敢妄意狂斐以為二公之德之懿作新政治乘幾與時
其措置云為必大有以異於前日主上踐阼於北二公
登拜於南而僕有是行一世之事業與萬世之事業可
由此而建生民自是而生矣於是忘其固陋不自量揆
蕪辭蔓語勇不自制喜而為之多激而為之切倒廩傾
困無所藏蓋似大而誇其實懇惻昭著至盡而明也凡
辦天下之大事必立天下之大節而一之以誠豈區區

小智子子小數掩匿蔽昧而襲取之者所能哉故僕不敢竭盡也二書既備又屢言於關移關移既切又誓言於書式越行人之例負僭易之責稠複周悉期於一悟在僕者亦既盡矣其成與否則在執事於賈公執事顯面正朝賈公秉鈞當國合符應契中外持衡天開此幾為二公用治亂安危實此乎在其保合太和使羣生咸遂濡龐澤於不竭張鴻休於不朽致君於堯舜躋民於仁壽干戈不試朔南無虞遺黎殘姓復見慶厯大定之

治天地萬物各盡其用者惟所命挑怨興禍使鋒鏑餘
民殘盡而無子遺者亦惟命僕之事業業已如是使卒
有用對揚主上知遇不負於初心與所學者惟所命使
之蹇跋顛沛學於有用而卒無用者亦惟命雖然賈公
於執事學際天人為一世元氣致位將相生民休戚之
所係其所負任者亦自重矣又何俟僕淺淺之言哉嗟
夫士之所患無時與不遇故有終身不能立一事者無
時與不遇猶不忍自棄也猶著書垂世託之空言以自

見至於孟軻之距諛行放淫辭以承三聖議者猶以為功不在禹下矧於得時行道撥亂世反之正厝天下於治安者哉天道循環無往不復金亡以來兵亂極矣極而必治理勢然也故剥之上九稱碩果不食桓公無王而十年書王變風終陳而繼以幽聖人立經陳紀以為治極必亂亂極必治也今北朝則主上踐阼急於為治南朝則二公登拜咸與惟新事幾鼎來和氣荐至則僕之所學果有用矣自到五河及移沙洲綿歷五月書劄

關移一無所報今始南轅大懼鄙外不能自進於門墻
於是又為喋喋顧瞻江淮風濤滿筆冒次餘波亦為從
吏不知江淨天澄徹去藩垣兩無猜阻竟在何日賈公
望重地絕已重干瀆不敢復陳區區之心惟執事是望
未卜良晤冬律權輿萬望對時綏育膺受厚福不宣

李制置回書庭芝頓首拜啟奉使翰讀大學士比勞
徒御來次淮壩知使指雅在弭兵繕帷我朝以仁立
國儻信義交孚南北息警此聖主所樂為者一再承

問備認輸情第信使以美意而來松壽乃懷姦以逞
修南城闢北鎮幸我先備得以勝之以此而和殆類
欵我今聞外方且飭備於行人之事未敢轉聞且令
潘鎮參具白此意必使松壽無害於成然後執事始
可卽命造朝也冬寒更異珍嗇不宣十一月日庭芝
頓首拜啟奉使翰讀大學士

再與宋國兩淮制置使書

經頓首拜啟自到境內既蒙改館復令幕中名德致書

置燕敬佩至意茲承朝命宣賜銀絹而加恩禮雖朝廷
推仁實惟執事孱就之自出益為感刻然自陞辭南轅
星窮歲易束臂舍館坐糜餐牢近過天基節方具劄拜
辭而有是命馮馮翼翼以為便當束載而復寂然益為
踧踖不寧事非難處不知何故之以而淹遠如是前書
以淮安之役相訝今見省劄猶斥而不置淮安之役經
等何與政所為魯酒薄而邯鄲圍者也夫邊將之事行
人之禮初不相干況我輩乃主上之使非李公之使歟

兵之計殆不其然第恐歲月淹久聘使不出中間蘊蓄
別起端倪李公素號驍雄而又驟勝一旦折辱不能寸
克則乘驛而上以拘信使平南城激怒廟堂移檄諸鎮
而起忿兵東務方作嗇人在野飄忽而入再為揚塵則
貴朝必起應兵兵端一交禍亂何時而已使人何日而
歸乎且青齊塔察國王之分土而李公王之妹婿也伯
姬雖歿叔姬復來今王有定策之功而士馬精強必相
率而致怒故宜早令我輩北還經雖不武亦能以理譬

解而抑其鋒其修南城襲北城戰淮安亦得數奏明其
師之曲直顧惟方今之事無大於此而無急於此者宜
急而反緩何也抑又思之以堂堂大宋而與區區一鎮
將校短量長而屢以為辭得無使人得以窺其淺深而
擬議之乎嗚呼中州遺士鋒鏑之餘收其驚魂引其餘
息營緝鳩贊締和圖安回生意於寒原泮冰天於雪國
發為陽春再立元氣而有主上斷然行此雖云天意亦
人力也治亂之幾於是乎在後來之英俊一世之豪傑

斂羽毛待風颺伺隙而投間者莫不引領拭目共觀此舉頓兵鋒之銳服豪傑之心塞覬覦之意老悍健之師雖不隳都銷甲使之戢縮自退而無所施厝天下於治安此其時矣議者必曰北方有故姑留信使吾當收卞莊之利或以為故境可復中原可圖聽玄謨所陳豈無封狼居胥意以是而稽遲殆必誤國夫南北之事漢晉以來至于今其成敗皆可考親仁善鄰則治締怨連禍則亂無出此二者自非大亂滅亡一彼一此徒以斃民

義之之書蔡謨之議藥石之言也矧於自古易代之際
不無小梗骨肉之間豈皆安和周之管蔡漢之吳楚唐
之巢隱皆是也雖或稱亂終以殘滅詎可以是為利而
隋好崇讎乎今主上應期開運資賦英明喜衣冠崇禮
樂樂賢下士甚得中土之心久為諸王推戴稽諸氣數
觀其德度漢高帝唐太宗魏孝文之流也故宜先於此
復以成歡盟夫內交於牽聯有故之際則易求成於安
強無事之時則難此經所以披露肝臆不避僭易借箸

而為籌者也事至今日處置云為在君相與執事君相則不敢干瀆以重取罪故又振凌滯氣撼搖枯舌強為一鳴而復於執事也庶幾與此新歲共成陽和發育萬物咸躋仁壽

上宋主請區處書

大蒙古國信使翰林侍讀學士郝經等謹昧死載拜獻書于大宋皇帝闕下前歲三月主上踐阼命經等奉書告登寶位輸平繼好弭兵息民經等草芥固不足以奉

揚明命然亦不敢貪冒行李昧於一來以久聞陛下仁
聖而主上亦以仁行竊不自揆庶幾兩朝之仁因是以
達於天下於是沛然而行而不忌也六月初至境上于
五河于濠梁于儀真今凡九月夫以兩朝之大兩國之
重生民之事之多敢自以為淹而私憚煩有欲速之心
乎初未入境時見陛下批荅王楫等事有云中孚信及
豚魚忠信行乎蠻貊彼以善意而來朕秉至誠若夫成
功則天也以為仁聖如此而主上又先以信使申以忱

辭下臣獲考其無疑矣乃今綿易歲月靡耗饗牢積委
賚予迄無成命實為不寧顧惟經等鄙外疎遠重以羈
旅宜乎頓滯卒不自露蒨蒨則醜蔑之面終無異於滅
明竊惟王者王有天下必以天下為度恢弘正大不限
中表而有偏駁之意也建極垂統不頗不撓心乎生民
不心乎夷夏而有彼我之私也故能奄有四海長世隆
平包并遍覆如天之大使天下後世推其聖而歸其仁
故孔子贊堯曰大哉民無能名贊禹曰吾無間然言其

君人之度如此其道其德乃如此也故貴朝高宗皇帝
有曰國家兵不及漢地不及隋民不及唐所以維持人
心者風俗也風俗者何仁也仁者何愛利而不殺公普
而不偏犯而不校遜而不爭不以地以道不以力以德
不以衆以禮上下薰陶守之如一所以為三百餘年之
命脈也太祖皇帝初受推戴入京師兵不血刃嗚咽流
涕感人心而服天命仁之原也親平三叛置燕雲而不
取授李彝興以節鉞仁之度也創業垂統闢略宏遠立

廣大之規模使聖子神孫儀刑世守至於太宗皇帝創
拾諸僭平有河東威靈大震益務德教期於休息真宗
皇帝澶淵之役從綏弗及反窮守約而與其成圖惟安
治仁宗皇帝推明信義再為定盟由是海內乂安隆於
禮義民物滋殖教化盛行遂成風俗高宗皇帝所以推
本而言為之力行知鞭之長不及馬腹匿瑕藏疾再造
區夏奉安列聖保有下民積德累功祈天永命多歷年
數而中興之主也聖聖相承罔有逸德故能見遼金夏

人之滅以至于今而紀綱正君臣和風俗厚文物盛藹
然仁愛之治遠軼漢唐駸駸乎三代比隆也恭惟陛下
久御宇內仁聞四塞積德而化內恕以仁故能遇警不
聳釁禍不鑠今當天人厭亂碩果不食接續元氣迓衡
弭亂之時政陛下恢弘正大撤去藩垣親仁善鄰隴籬
崇好張皇一人大明公恕以天下為度之日也夫貴朝
之與本朝初無大故三十年間雖事之殷累承通好而
本朝多故卒無有成蓋天方開亂聯戰鏖兵彗撲鼎亨

大有以革其曲直之責亦有自任之者本朝立國五十餘年天將韜戢鋒銳而底安治故令聖德集于主上資賦仁明樂聞善道喜衣冠躬禮遜樂賢下士自在潛邸已符人望於是致之先帝而退守藩服聘起儒生論講書史究明理學問以治道嘗以為創法立制乃可底平弭兵息民其先務也先帝嘗為大舉主上力諫諫而不從致有合州之役受詔東出至于渡江實非本心十餘年間遵養時晦將以大賚于民者今始得行故即位之

初首命經等奔走致書此亦曠古希闊之遇南北二朝罕有之幾也以為揚鞭而入挂席而出即見二境玉帛交馳於是經等握其機汲汲而來豈意貴朝牽於疑置而不急必有橫議以移天聰蜩起事端各陳便利自以為公私而不國荏釁種禍因為交亂大見鄙外以誤某等夫較短量長欲圖報復者淺淺之謀也姑留信使坐以觀變者子子之計也交亂輸欵以圖夾攻者良嗣之徒誤國之人也貴朝以仁立政陛下以仁存心夫豈必

爾為寇讎無容為善自新必爾於擯蔑而絕之無乃亦有所失非聖人先王維持人心之意乎且某等之來斷然為之以行夙心者主上也合謀啟迪對揚天衷者欲親諸王也經營比次計安遺黎者六七儒生也夫狡焉思啟封疆以亂為利者何國蔑有燕嶺之北河湟之西姑置勿論藩方侯伯牙錯棊置各土其地各分其民擅賦專殺父死子沒今一再傳年皆未及四十書傳方略時務情偽莫不明練而各握重兵多者五七萬少者亦

不下二三萬比年以來鏖戰長征山川險易靡不周知
以經觀之其寧甘於束臂坐老歲月志富貴而已哉以
主上英明統御有方懷服有道故皆雲從景附若今信
使交通相與報聘申畫疆理要結好事講睦修文數年
之間紆餘舒徐鎮壓解弛使其壯健衰猛厲弊干戈朽
鉄鉞鈍強雄之氣潛以消沮殺戮之運庶得少回貴朝
祖宗仁愛風澤亦得流諸華而濟諸人以引以翼傳之
無窮則自陛下始不然則事幾差繆威武再奮各得信

其蘊隆講鷹桺虎掣去突出際風飈之會起雲霄之志
相與牽聯共為颺颺北朝有事則南朝不能無事一塵
河朔載渡江淮則誰復誰何聘而不報使而不入某等
何惜第恐異日有以歸曲而或傷累朝之仁累聖政之
萬一也昔韓愈述破蔡之功曰凡此蔡功惟斷乃成今
日之事某亦謂在陛下斷之而已夫天為剛德人君體
之剛故明明故不惑不惑故能斷斷則天下大事無不
行亦無不成天下恃之以安也牽於多議優游不斷漢

祚所以中衰天下亦因以亂也詩曰發言盈庭誰敢執其咎書曰惟克果斷乃罔後艱陛下聖學高明英偉夙著何待疎遠之臣之言哉某等自啟行南轅至於入國南北之事一無聞知其間變故已與初終錯迕不同兩朝之事朝夕之間變不可必一日則有一日之變一月則有一月之變某等之歲月有限兩朝之變故無窮以有限之歲月待無窮之變故某等何辜哉伏望陛下仁覆矜閔察其螻蟻體太祖一仁之本原太宗一仁之涵

養真宗一仁之要約仁宗一仁之風俗高宗一仁之命
脈不限中表不為鄙外不心乎南北心乎生民答主上
之盛意允遺黎之僊望乘機趨會攄抉潛慝保合太和
使天下後世稱陛下之仁曰五十年之兵亂至是而止
經等亦得因依末光守先世之弊廬涵泳太平感恩佩
德死且不朽聘而不報使而不入因仍苟且遂成變故
締和圖安反以稱亂陛下之仁不能及天下主上之命
不能達則經不能共職遂隕好事負君負國自怨自艾

永以自責亦死且不朽如申命下吏畀一明命無庸此
輩玷污壤土姑緩其死俾完守以歸使主上治其無才
無術曠日淹久卒無有成之罪亦死且不朽自至境內
已嘗致書於執政及制閫又因給賜上表陳謝因以陳
情顧惟經等之技之心亦已傾盡而猶未白也故有申
飾固陋罄竭悃赤剴劃肝肺觸忌冒諱天威不違顧豈
敢有藉襲而或靳隱貴朝元老碩德如雲如林陛下聰
明神智幽遐罔蔽其處置云為必大有以允當也何待

經言雖然言之重辭之複其間必有大善惡故春秋有
屢書再書聖人定書則夏之書四商之書十有七周之
書三十有二非故如是之少如是之多也君臣之間信
則言簡而略不信則言重而繁矧於二國之間風俗不
同好使不通信義不孚大兵之後而濟以言又閼塞頓
阻不能成行故鬱於中而有不能已焉者所以喋喋弊
弊知其獲戾而不顧也陽靈扇和伏願對時育物大庇
生民允屬塵望經等謹昧死載拜以聞

與宋國丞相書

經頓首載拜啟太師丞相國公閣下自卸命造境授館
儀真累蒙燕勞敬佩至意近又傳宣撫問而加給賜不
能隨即裁謝是懼是惶經居燕趙之交在馬牛下風天
淵海山懸邈限越而於是時已聞執事之議淪淪灝灝
從臾一時私相告語以為必相天子而底南北之平一
日亦驟受其賜及主上踐阼經承乏使人則聞執事果
膺登拜符敕寧之幾會隆平之運大允南北之望龐艾

輝炳瑞日祥雲賁增天光於是趯趯而喜而莫之勝也
昔遼主聞相溫公乃救邊吏曰無或生事中國相司馬
矣今執事為相而主上適命輸平之使宛然翕合不無
以司馬公之事業望於執事也夫天之所以賦畀於人
不偶然也有是君則畀是相有是相畀是事業人之所
以荷天之畀亦不易也相是君則行是事所以事天也
政有所未立吾相矣吾當為立也事有所未行吾相矣
吾當為行也以至亂有所未弭民有所未寧君子有所

未用小人所未去吾君之未遑吾法之未備吾相矣
吾其能已哉及汲汲焉弊弊焉不敢少有暇逸必去必
行而後廢者舉缺者備弊者革然後取古之人相君而
未嘗格之君者舉而行之為一王法增益前人之光而
為日新之政則相業至矣事君盡矣事天謹矣嘗以為
周公相武王有未下車而行者有下車而行者至於仰
而思之夜以繼日幸而得之坐以待旦奚為如是之急
哉一有所未行則民有所未靖也而或自暇自逸豈先

王相我後人日是不食咸和萬民之意哉蓋亦不得已也故溫公作相曾不幾年新法之未便舊典之當舉者更易殆遍至於憂老以終天下至今稱為賢相不敢以急遽責去民之虐底民之寧當如是也竊惟方今之勢禍天下者兵福天下者和相君而宅人者當何如哉去其所禍就其所福可也夫為禍福者在於北成禍福者在於南且如北朝不肯休兵夫孰能止之雖南朝欲休而莫能休也南朝欲和而北朝不從雖欲和而豈能和

也哉故為之計者北人好用兵因其欲止而止之鮮於和因其欲和而和之則亂可弭而天下被其福也好用兵而激之以兵鮮於和而拒而不和則亂無期已而天下被其禍也故曰為禍福者在乎北成禍福者在乎南本朝與貴朝初無大故無故而交兵者幾三十年未知孰主張是而使至此極也天哀遺黎濟剝以復主上踐阼下止兵之詔發輸平之使導迎嘉貺去天下之禍集天下之福適執事登拜於南是天贊之使大有以成變

茲福於無窮也。以為貴朝几不及布庭，不及灑僕等有以得道路稽遲之罪，匍匐一拜，啟鑰進書，合兩朝之和為一元之氣，洋洋之幾波，湊鼎集措天下於萬世。一時出生民於萬死，一生使天下後世稱之曰：雖北朝仁愛之心而成之者，執事也。由是以開維新之務，裨益相業，翼明中興，而乃館留儀真，淹易歲月，宜急而緩，實有所未解也。自陞辭入境，南北之事一無所聞，每與一二介佐自責，自咎無乃主上舉之之失而未見也。行之之速


乃宜速也無乃僕等委之之非而不知也命之之違而弗敢也何至於是也方今之事莫大於此莫急於此而淹緩如是反而求之既不在於主上又不在於僕等不知孰為之而孰致之抑其天欲未福於民而猶將以禍之也抑其為人階禍而不欲其福也推明其故而莫之知也抑其不無望於執事抑其不敢蔽於執事而數心腹而自獻也其或是也與或非也惟執事處也其使進見以達主上之命而復書遣使以成其好固所望也其

使進見復書於僕等不遣使而命之回亦可也其不使
進見具書遣使俾與僕等即此而回亦可也是豈執事
欲為之或其事勢一出於此有不得已者抑僕等嘗亦
受教於君子固非生事而交亂者也其即此而回則亦
平心易氣告諸主上以為貴朝與執事非故為此有不
得已焉者方圖後舉汲汲而至也主上聖度優宏既先
以禮夫豈增忿返以自違亦必恭已而待矣第恐執事
牽於多故念不及此僕等不能進不能回而猶在於此

方春疫起或有變故虛其望而失其期莫能追悔僕等
何恨第恐有以瑕類於相業也嗚呼僕等兵亂之後束
髮志學期於有用而行之也遭遇主上樂賢下士即受
弓旌之聘及其即位而有是命慨然而行如或藉賴脫
民於兵而底於成使南北少見安治則執事之賜也橐
跋顛踣水益深火益熱坐視天民之斃而莫之援所學
所志卒無有用貽天下後世之非則僕之責也於執事
何有哉竊觀河朔自金亡之後碩士大老英偉之人流

落殆盡而一二慙遺收緝殘墜致之主上乃有今日其
發詔命使之時莫不扶杖引領惻然沾涕曰不圖今日
復見盛事更須忍死以覩其成厭亂者則如是也後生
晚進無科舉之羈束無學校之礪錯自其童丱便習兵
革其肯如是乎瑰岸突兀隱隱自負莫不自以為王猛
高允崔浩蘇綽將自致霸王之略姑刮目視此以為進
退也慰老成之望服英俊之心在茲舉矣執事必有以
處之也積日累月久為茹突感於德度為一快吐惟亮

其淹抑而加怒蚤賜區決焉有上大宋皇帝一書更望
敷達以白塵悃未遂參覲惟冀惠時珍攝變和元化光
慰輿望至祝不宣



陵川集卷三十七

欽定四庫全書

集部
陵川集卷三十八

詳校官中書_臣孫溶

主事_臣呂雲棟覆勘

總校官編修_臣王燕緒

校對官編修_臣汪鏞

謄錄監生_臣陳詔

欽定四庫全書

陵川集卷三十八

使宋文移

再與宋國丞相書

元 郝經 撰

經頓首載拜啟太師丞相國公閣下曩者南北定盟國
有定命使有定辭禮有定數使來如歸徃反之間不過
三數旬無出疆之專無請覲之私無僭易之言周旋禮

律加之以敏而已矣故禮無不答行李不淹國家安其
利生民被其澤而使人亦擅皇華之美振耀一世而以
為榮也若夫盟好未定約言未成變故相仍梗塞猶在
則大夫出疆有可以安國家利社稷者專之可也請覲
不以為私多言不以為僭故張溫使蜀未見而先抗表
鄧芝使吳見拒而即通書論者以為得而不以為失經
等自到境上至於受館如無阻遏即得成禮自視區區
兵亂之餘糠粃土苴之學將觀禮慕儀覲

音 渾糧未見瞻

顧之不暇安敢輒自振暴露短於三百餘年文物禮樂之朝乎以為疆場交兵幾三十年宿憾蘊隆怒氣旁魄一旦欲使委餒銷鑠舒徐安緩而底之平非大為剖白則不能也於是弊弊纚纚忘其固陋不計辭之工拙時之忌諱而枵然傾盡苟能解鄉閭之鬪則雖被髮纓冠而亦徃虎害可除則攘臂下車從為士者之笑果可濟人濡乘輿而不愧於無術也既朝廷不得造執事不得見制使不得接於是作為表書關移公牒而皆不見答

經等如是之無所靳汲汲切切而誠且盡而貴朝乃鄙
外不急置而不問如是之擯蔑也必議者之不察以為
此輩不識時務大兵之後敢涉吾地而踵王楫譚浩之
故計必爾乎拘之雖執事高明正大橫議之多不能無
搖於中而亦有意乎督過之也不然何錮滯淹抑之如
是經等亦頗受教於君子不畏義死不榮幸生夫豈一
旦臨小利害遽有所惜第恐傷貴朝積累之仁失遺黎
僕蘇之望啟豪傑覬覦之心種南北殺戮之禍中州遺

士經營啟沃之勤無所濟主上兼愛好生屈已通好之
美意無所成此所以重為之惜懇懇灌灌猶以為言也
夫天下之安危幾而已矣一失猶可不可再也再失猶
可不可復再也主上自在潛邸貴朝奉使王元善等至
朔廷所持書幣實在貴朝皇帝主上以為國家用兵歲
久議和通好此其時矣雖前朝事今日猶可行也乃聘
師儒魏璠王鶚以議之及先皇帝踐阼遂命送還貴朝
奉使遣术速門等報聘以不使入見歲月淹遠茲人藉

以激怒於是有合州之役主上每為咄嗟惜當時主
上方御西師南平大理不見處置使人之事向使主上
在先帝左右必不至於是故生此厲階至今為梗是事
幾一失也歲戊午主上行營至真定之北牛鎮謂經曰
今師之出皇帝所命也一日事定汝為吾使宋講信通
好以安百姓經拜手曰經不佞不能奉承明命弭兵息
民天地人神之福也其何敢辭主上曰一日便當行耳
乃知主上通好弭兵之心有素也及其渡江得合州函

聞乃議班師令丞相趙公於鄂州東北隅萬人敵下與
貴朝約言曰如辭順便可許和退師而言者忽略不一
竟不得底要是事幾再失也雖然猶命緩攻退師喻蒙
古漢軍諸師曰我今北定大事汝輩勿復攻擊總攝諸
軍濱江駐劄無得侵掠以俟後命遂乘驛而北不意蒙
古漢軍諸帥不遵約束攻城侵掠備極凶暴大傷和氣
主上既至開平受諸王推戴即下詔於順天起經於病
中畀之書命授以金虎符今奉使貴朝告登寶位布弭

兵息民意命經略史公賁詔徃江上諭旨言有信使仍
還江上兵適蒙古漢軍諸帥棄師北歸而史公不得前
主上即欲治諸帥方命擅回之罪而值即位大赦雖貸
而未釋也時經等已在路月餘既至東平而李行省連
三致書言近遣人於淮安報信使之至仍先奉書要結
好事為葉安撫所殺且聞毀都亭驛下詔告諭誓不與
北和公等毋入不測也既而又令一幕官來邀令回經
等以為主上美意有素今日甫行千載一時不可中止

宋國禮義之邦專務德化事循典則寧有不測苟盡吾誠以奉吾君之仁迂續兩朝遺黎既絕之命其成與否繫之於天且仗節即路之日百姓無不遮馬快觀至有涕泣者曰不圖今日復見盛事人情如此天意必從吾輩豈可懷私偷安半途而廢乃移文告諭沿邊守將不得無故興師搖蕩疆場西至雲南東傳於海鑄戒諄復重為約勒遂自蘄宿至於五河貴朝果遷延不納一行介佐三節人員莫不請回經等以為事至今日更為少

忍露宿茆舍泥飲糲食蚊蚋之與居狐狸之與伍枕虺藉蛇暴冒氛霧嘔泄並作瘡瘍交攻而不憚也如是者三月及朱制幹秦通判相邀登舟乃拜表闕廷移文邊鎮以為順流東下便當成行而復汧流而西置之沙洲者一月儀真授館以來雖恩禮加厚坐享餐牢而使人之事竟莫區處今復九月初謂本朝有故請回而不許及得蘄宿回文復無他故而又不放還如稽留我輩有益貴朝雖老死片天之下不以為憾如其無益徒役人

衆耗糜稟餽箝口束臂塊處株守面四壁而不聞無一人而與問事勢淹遠人情憚煩多言而必謂之躁催請而必謂之急不言而必謂之怒喟嘆自艾而必謂之怨積日累月必得罪於衆左右矣不能成事而反生事此焉是懼且速門之事合州之役武昌之舉江上之師皆先朝之事非主上之所欲為主上之心經等所奉行者前歲三月二十四日之事也迄今乃復周歲其間事勢與國書所言詔命所授必皆不同貴朝難以處置經

等何由入見惟執事加察曲為聞奏即賜區處如信及
經等成禮遣使保於無虞兼以與靳宿文字已言貴朝
具禮遣使達之本朝矣如猶有疑必於難處放令歸國
以為後圖不然則寢以生變進退不能李行省之言為
驗經等獨受室蔽迂闊之責事幾復再失之則南北永
無好合之事天下後世無復有為生民橫身負任者主
上必謂汝輩嘗謂此事宜行今乃如是責其偽妄則皆
得罪中州遺士無復子遺是最可痛也事勢如此關係

重大雖有雷霆之怒斧鉞之威必復再干瀆而不顧也
久在舍館從臾下風饜聞執事之議善處大事能弭大
變出御藩方入總庶政始則有陶士行之敏而威名則
過中則有謝安石之賢而德度則優將以導迎和氣弘
大信於天下以成其終經等之事所以動天下之幾而
莫有大焉者宜乎執事之謹處之也東裝荷檐拜書鶴
立佇聆明命暑勇方盛萬望對時珍育膺受厚福不宣
復與宋國丞相論本朝兵亂書

經頓首再拜啟太師丞相國公閣下久在舍館累塵清
聽知以數瀆獲戾而國家利害民生休戚姑塞填梗不
能自制故不復計其煩疊若貴朝疑而不處僕等默而
不言則差池更端錯迕兩置日益背左睽離乖隔何時
而已使人之事當變故非常之時則竭盡忠赤力為剖
白開陳利害萬折不衄職分然也豈箝口從諛以常自
處靡靡碌碌坐制於時甘為賤丈夫則非為僕等之辱
亦執事之所惡也今日之事固知進退在於執事從死

在於執事使之榮使之辱皆在於執事固惟所處也抑
其有誤於執事者可靳忍閉密從其誤而不變乎非惟
誤於執事顧亦誤於僕等非惟誤於僕等顧亦誤於二
國僕等之死徙進退之事小二國之治亂安危之事大
雖不見信尤當論列也昔孟軻去齊三宿而後出畫韓
文公三上書宰相豈去之不勇求之太切乎君子濟世
之心天地生物之心也豈有一不見信則悻悻而去遂
自棄絕哉僕等銜命造境歲月淹遠言之不為不盡待

之不為不久初以李行省之事相迓今則不復犯邊復以訛言變故相動今則萬安無事而猶不放還無乃說者以西王之梗指擬為辭將以僕等為藉手之具以之幸災觀變乎是所謂誤於執事者也夫貴朝億料之見豈若僕等之親見間探不根之說豈若僕等之親說說者必謂北方有故西王爭衡主上之立有可議西王之勢反可興如此而稽留如此而待變如此而誤執事如此而誤兩國豈可不為之辨遂使卒有誤乎夫主上之

立固其所也太母有與賢之意先帝無立子之詔主上
雖在潛邸久符人望而又以親則尊以德則厚以功則
大以理則順愛養中國寬仁愛人樂賢下士甚得夷夏
之心有漢唐英主之風加以地廣衆盛將猛兵強神斷
威靈風蜚雷厲其為天下主無疑也故屬籍之尊而賢
者合丹大王先帝之終率先推戴摩歌大王主上庶弟
也在諸王中英賢亞於主上嘗處大事不動聲色先帝
臨終畀以後事先歸推戴塔察國王士馬精強嘗代主

上帥東諸侯亦先推戴倏烈大王總統西師奄征西海
鎮壓西域三十餘國主上母弟也去中國三萬餘里亦
遣使勸進言兄亡弟及祖宗法也長兄既歿次兄當立
兄若不立吾誰與歸主上乃集大統應天人也即位之
之初首發信使通好貴朝弭兵息民聘起諸儒更定制
度則賢主也不意一二懼罪不逞之徒糾合奴隸間離
骨肉劫立阿里不歌大王締起兵端拒命漠北以次則
幼以事則逆以衆則寡以地則偏兵食不足素無人望

一時跳踉終就擒

同摺音攝

滅夫開平至和林四千餘里彼

所據之地又去和林西北三千餘里在金鐵山外其極北則骨利幹等西南則火石林牙諸回鶻也乃漢西突厥北偏地窮荒徼陰寒少水草薄土瘠大抵皆沙石也其所從之人惟是西域近左小小部族為所脅制者如為必死之寇并命衝突不過乎闐澹海窺河湟搖蕩遐裔而波斯外五大食安息等皆西域強國與相犬牙亦足相制矧於倏烈大王統御西土其容大肆僭逼縱使

叔制其子詎肯以兄臣弟且其兵勢足以自帝一方又
詎肯以衆從寡以順從逆以強從弱則彼卒無所成無
所疑也今主上既以正立一時豪傑雲從景附全制本
國奄有中夏挾輔遼右白霽音習樂浪玄菟獫狁朝鮮面
左燕雲常代控引西夏秦隴吐蕃雲南則玉燭金甌未
為玷缺藩牆不穴根本強固倍半於金源五倍於契丹
縱彼小有侵軼則塔察國王一旅足以平盪其餘三十
餘王猶卷甲牧馬從容營衛矧於中國諸侯如史如李

如嚴如張如劉如汪等大者五六萬小者不下二三萬
虓將勁卒狴習兵革騎射馳突視蒙古回鶻尤為猛鷲
則前日北方之強轉而為中國其肯使蠹國害民之尤
者復肆蛇豕彼雖死寇此亦死敵也彼之崛強祇足以
自斃而不足以為害明矣說者豈可以便小本朝謂秦
無人以先遣使便謂怯弱拘留待變夫三百餘年禮義
之朝論議之多當如是乎且先帝即位此輩挑亂起釁
各肆窺窬主上令發回王元善等因以修好此輩則故

為沮壞以之激怒致令先帝有合州之役武昌之舉交
廣之師南北生靈頓斃數百萬先帝既終意猶未已前
歲二月復令脫里赤等大起蒙古漢軍十丁內再起兩
名以之西行部籍既定方行點數主上乘驛禽縛即罷
其役向使此輩可量也初主上未立中國無備之時此
輩乘之先人奪人或因可入今中國之備日修彼之力
日憊宛轉頓斃寢以腹削何所從入第恐窘急奪命穿
猝西偏迤迤而南一日或為貴朝之愛則政當講信修

睦通好合勢守衛中國計安元元貴朝備施黔以西交
趾以南塞黎雅之險增嘉定之戍本朝備漠北河右瓜
肅涼隴倏烈大王蟠亘西域扼其吭拊其背不能有為
則中國之禍庶幾乎息何乃羈持信使坐以觀變貴朝
之策果安在乎昔朝太祖陳吉思皇帝初并有諸部與
汪罕連戰言者謂金源章宗曰彼之相攻中國之利他
人之事不在已家不為之謀卒以失國本朝烈祖脫轡
皇帝自金房穿出貴朝襄陽守臣以為是將圖金何與

於我不為之拒四川荆襄隨以陷沒凡守經事而不知
權忽於近幾而無遠慮鮮有不敗者且天下之勢如一
人之身使心廣體胖丰容無故則可共為安泰如一處
受病則舉身不寧焉有斷一臂去半身從其潰腐不為
砭熯同熯音屑謂未至腹心以為無疾可乎使主上萬安中
國無事則貴朝可以安坐說者可以待變姑行讒慝以
昧執事如天未悔禍萬一有梗南北牽連相與鴻洞貴
朝豈能常如今日則說者之誤非為觀變是自待變也

故契丹之滅禍延及於貴朝金源之滅禍復及於貴朝
以及於今其可再令北方有故乎如其有故可以為懼
而不可以為幸也故為貴朝計者急於北復保合太和
亟謀唇齒葺護藩籬修理邊防獎率將士却浮搖之議
定堅凝之盟逐生事之人必力行為無所藉惜南北兩
朝庶底安定僕等此言擬於面進既無入見之理亦無
交際之期故規規反復瀝血剗肝又至此極說者又必
以為狂為愚一日或有驗則渠亦必復以為知言也竊

惟執事高明正大練達事幾慷慨服義必以為此惟說者之生事小智自私不與利害咸於頰舌恣為營惑指近利以為功引遠事以為證曲牽合以為辭知常而不知變見迹而不見理蔽俗而不知權或有誤於執事亦并誤於僕等惟加亮察幸甚幸甚

過總管回降與賈丞相書

自接納以來禮意隆茂以國事限越望崇地絕不能屢通音敬惶愧惶愧然再更冬歲月深久累為祈請不見

區處未知何故之以而艱阻如是僕等奉承明命通好
弭兵計安元元以入貴朝其進退可否則定於接納之
初邀之以入不使之出竊惟貴朝必不其然貴朝三百
餘年仁政是行禮義為治不為駁雜之事純務王化以
崇明信豈於通好使人亦既接納無故而不使之見有
故而不使之還固為羈留不與明降大為擯蔑終於不
遣如夏人之拒命契丹之敗盟金源之仇敵使人之來
貴朝處置逆則益推之以恩悖則益加之以禮不校尤

分曲天下莫不稱貴朝之義至於本朝王楫之往反無成未速門等要以難行之事貴朝皆置度外不重怒復怨禮而歸之天下莫不稱貴朝之仁豈獨於僕等而特有以異乎哉顧僕等之事非有大難處者如事體之不定變故之不虞橫潰之衝隔蘊蓄之蠹壞徒重恩禮而誤於接納別有牽制而疑於發遣事至今日亦宜通情相告諸所藏蓋一皆開剖撤去藩籬掃平畦畛豁堂奧之深邃敞宮府之洞達使僕等舌茹心服雖賜之鈇鉞

亦含笑入地何用如是之重且難乎委如本朝有故至
於分裂壞亂不能以國貴朝欲圖報復則下一明詔却
還其使命將出師無施不可貴朝酌進退之禮僕等全
所守而歸貴朝得義理之當僕等盡臣子之節則於事
體兩無虧損貴朝建極垂統保衛宗社維持人心忠臣
義士節節山立以至於今名教之力也豈忍使僕等束
臂兀坐失守喪節隕辱君命背棄名教則亦貴朝之所
惡夫復讎者不折莫干矢惟射者之發故交兵亦行其

使使人通好必有何罪而拘留不遣至意貴朝有可乘之幾又焉用僕等而為疣贅以相梗礙必本朝可與又焉用僕等淹遠歲月以稽好事至若貴朝長驅底定捷奏交馳版圖磨至則自貴朝事僕等亦當復命無遂留之理必本朝不幸果如貴朝所言復隍之變迄無所歸則僕等亦當壇帷致使三踊盡哭在我者盡而後事天待命必不偷生因仍苟且以自穢縱使貴朝不以為戮復何面目以見中州遺士僕等之事止於是而已而日

益昧沒漭無津涯反復思惟蝟起百端絜天斟海都所未解而二年之間四壁之外一無聞知塊處株守如幕上之燕釜中之魚凡諸文移如石投水隻字片紙不與交關使之局脊無聊號呼宛轉而卒莫之問生平之所躑躑初心之所熖熖一朝磨滅晦蝕殆盡而竟無矜閔者則亦命焉耳國事遲稽而家不能恤志力衰塞而親不能養未知何以獲戾而至此極既言本朝兵亂再報異聞不接國書却言入見事體違左必不可行今又坐

待數月復及回降引見之期亦無明降不能復自噤默故又一鳴激切之罪有所不避初望執事而來不請於執事則將焉往執事方隆相業遂底雍熙協贊中興巍然當國政爾駕馭英賢慰允人望豈獨使不幸使人沈頓於此以傷和氣望賜矜察斷為區處即此發還終貴朝曠蕩之恩全僕等區區之節幸甚幸甚惠風扇和萬望對時茂育膺受厚福光慰輿望不宣

與賈丞相書

經頓首再拜啟太師丞相國公閣下一自授館屢易星
歲竟不獲瞻望輝光漫為傾佇爾者牒請亦無回音不
免再為干瀆經等之事本自易處數年之間不克進退
是用喋喋以重速戾蓋不敢欺貴朝亦不敢負本朝復
不敢自欺亦不敢欺天下後世以誤生靈終不見報且
屢為有司扞格必其陳說不合事體而徒致干聒是以
歲月益遠變故益深睽離孤隔置而不問夫主上之命
使人而不忌經之奉命而不疑皆以素聞執事之議指

擬而來以為好事必成不知孰為厲階至今為梗一室之內旁薄抑塞顛連宛轉天所賦予已所固有平昔之負任及今之所奉行者沮撓銷鑠漸欲漸盡而復遭遇貴朝大故隋甑解瓦復無所望是天靳福祚禍未欲天下平治阻遏之極又重以此非惟貴朝之不幸其於使人尤大不幸嚮者事勢乖張今復氣數翻覆則經等安用仍在舍館執事方處伊周之任佐重光之命百官以聽四海仰成大聲轟礮正氣崛阜興滯補弊革訛飭陋

事有壅而必行釁有積而必彗理有暗而必燭勢有悖而必回蕩滌振厲烜赫一世咸與惟新經等之事既久且廢屯艱亦極亦望賜一區處如本朝可與不替好事經雖不佞亦足付畀如其有故終於無成亦望縱遣以閒館吏經等貪冒不識事幾以入貴朝同夫俘執固所甘心今既數年新朝肆眚亦冀昭雪昔魏武之於關侯梁高祖之於賀拔勝孔明之於徐庶皆謀臣猛將反覆去就知其無留意猶不固止矧於通好使人斷無不歸

之理而貴朝亦無終止之義區區一介留之不足以為
益去之不足以為損焉用耗糜饗牢幽閉嘆嗟以傷和
氣曩時無故弼成阿衡亦在執事只今有故轉幹剖決
尤在執事執事為之接納執事為之區處保宥終全以
禮進退則更生之賜皆執事之自出銘佩之意永永不
朽太簇布氣惟冀惠綏鈞履膺受厚福不宣

陵川集卷三十八

欽定四庫全書

陵川集卷三十九

元 郝經 撰

使宋文移

上宋主陳請歸國萬言書

大蒙古國信使翰林侍讀學士郝經等謹齋沐昧死再
拜上書于大宋皇帝闕下竊惟經愚鄙外使人信函未
入天顏未覩而不揆荒蕪輒重塵瀆惶懼惶懼經聞使

人受命不受辭銜命出疆無他事變兩君辭命之外固不容使人私言銜命出疆遭遇事變則必造命使綸綍不致縮絕而信義克著雖煩贅稠疊有不敢已焉者經自入境向使都無閑塞以禮進退則經豈敢踰閑越制于君命之外復置私言於二國之間哉由其于天下之至信獲天下之至疑以天下之至利蒙天下之至害本欲澤加于四海而乃禍叢于一身所以觸雷霆犯鈇鉞傾蠡于萬尋之底側管于九地之下撞寸莛于洪鍾舉

燭火于太陽覲天日之一見曖昧之一白也於是始踰
年時即上書闕下不報復上書宰相又不報經愚瞢昧
不識忌諱以為奉揚君命負任二國提挈希邈之幾輸
納和平之美當不諱之朝遇聽言之主一有阻絕即依
違顧望自同寒蟬輒遂噤默則懷姦辱命甚矣雖以為
愚且妄狂且惑不命之進退屏蔽其耳目儘其號呶而
不聽從其狻猖而不顧而不少自沮撓益為刮剝剝肝
漉血盡智畢慮比飲以進至踈而為至親至離而為至

合乃一表復表再表一書復書再書牒省院關制府陳說者非一一皆不報今既綿厯四年薦更寒暑禍變外鑠中熱自焚抱臂感額氣息縷縷必漸以漸盡豈能捫舌以坐盡又當引領而快吐明天子賢宰相或一感悟昭降大命終成好事使之歸骨以見主上則銘佩之意死且不朽至于盡言取怒或賜死于館下則九原不敢憾夫天下之禍始于天下之不一自兩日並照海宇分裂各土其地各分其民事乎此者則遺乎彼謀于北者

則不及南一元之氣散而非人被其害相與爭奪并滅而公天下之義廢必有兼愛無私一視同仁之君復有保合太和道濟天下之臣視彼猶此視北猶南撤天下之藩籬破天下之畦町曠然一德充實無妄卓爾而立而不惑斷然而處而不疑一以忠恕公普待天下天下雖不一而其義固自一天下雖不合而其義自昭然而無間也方乾坤破碎角立瓜剖而乃對面齊秦肝膽楚越弊弊焉自營之不暇戕生人禍天下何時而已乎夫

天下有定理而無定勢聖人馭天下之大柄本夫理而審夫勢不執于一不失于一而惟理是適是以舉而措之成天下之事業以天下之至靜御天下之至動以天下之至常應天下之至變以天下之至無為而為天下之至有為勢莫能定而理無不定推理而行握符持要以應夫勢天下無不定也賈誼有言湯武之定取舍審而秦王之定取舍不審審者何審夫勢也定者何定夫理也取舍者何理勢之間也見夫勢必求夫理輕重可

否不相違戾而後權得而處之定天下之大柄不去而
行夫臨制之道故不以一己之勢易天下之勢不以天
下之勢易一己之勢不以已然之勢累本然之勢不以
當然之勢累未然之勢定于中審取舍于外操存其理
而曲盡其勢王者之事備矣夫一己之勢如是而便利
如是而遂樂而理有未安者寧違于己以徇夫理是不
以一己之勢易天下之勢也天下之勢如此而可以有
為如此而可以得志而理有所不可者必反諸己以求

夫理是不以天下之勢易一己之勢也天下之事業已如此屹然不可移也判然不可變也而理不可焉必棄之而不為也是不以已然之勢累本然之勢也方今之勢當如此也而一時則可異日則不可不為也是不以當然之勢累未然之勢也如是則審勢求理無不盡矣故曰天下有定理而無定勢也若夫聖人在位大一統以安天下際海內外靡不臣屬有天下之全勢行天下之正道無復有餘事矣不幸而紀綱衰微遂底頽敗則

迹夫所以衰求夫所以興此自一勢也修而安之以復其初亦自一理也又不幸而豪傑並起割裂河山相與為敵莫能相尚此又一勢也撫而安之各保其有此又一理也故大一統以安天下三代漢唐及貴朝之盛時是也修而復之以安天下周宣王漢世祖之時是也不能有天下之全而各安其所有六朝五季之際是也南北並起中分天下以交際之道共求安治貴朝中葉以後及今日之事是也不計夫勢之強弱兵之勝負時之

利病事之得失一之以和而本之以理此貴朝之所以
為得也抑不知當今之勢當然而理亦當然耶當今
之勢已然而理亦已然耶竊惟貴朝今日之事有似乎
徇夫勢而于可否之間有未盡夫理者貴朝自太祖受
命建極啟運創立規模一本夫理其取淮南平三叛滅
唐蜀拔其武功有不逮漢唐之初而草弊政弭兵兇弱
藩鎮強京國意慮深遠貽厥孫謀有盛于漢唐之後者
嘗以為漢氏之治似乎夏李唐之治似乎商而貴朝享

國之久則似夫周可以為後三代然而貴朝國體則以
正為大國勢則以弱為強而維持人心莫衍國脈鞏固
疆理孱葺基圖則和平舒緩寬柔將就犯而不校不以
力爭以惜兵愛民為本故有夏后氏之質而不華有商
人之敬而不肆有周人之文而不蕩有漢氏之公恕而
不疎有李唐之德義而不雜度德而處量力而用逡巡
退遜保宥安全無赫赫甚大之名有皞皞治安之實致
力于綱紀文物禮義不侈于甲兵土地人民不為孟施

舍之守氣而一以曾子之守約其勢常屈而其理常信
故能祈天永命踵三代而軌漢唐是以聘契丹交金源
待本朝不愛重幣厚禮而使者冠蓋相望于道使顯德
之民增羨數倍雖靖康之難而資東南之富庶足以立
國安疆徙都定鼎以及于今其勢益屈而其理益信或
者亦嘗棄理而事勢矣圖惟未成而禍變輒至或者又
嘗惡屈而求信矣勢或少信而禍變輒至一再有為徒
為厲階至今為梗一理之定必不可違一時之勢必不

可成者亦可見矣蓋自石氏失馭耶律氏入汴天下便有南北之勢以周世宗之英武僅能取關南數縣終不能復有燕雲太祖受禪則姑置北漢使藩翰契丹席周人之威遂平諸僭終不以燕雲為事但畀邊將以權使專制生殺捍禦疆場而已創業垂統保大定功卒安中國殆深見夫理而不拘夫勢此其所以聖也聖子神孫繼繼承承世為儀刑與之定盟至于金源信誓愈固是以南北樂生幾三百年一理之定用之不盡而享之無

窮者又可見矣夫有天下者孰不欲九州四海奄有混
一車同軌書同文行同倫息貫草之射而包干戈以虎
皮德著刑措幽遐罔間端委垂衣而天下晏然穆清也
哉理有所不能勢有所必不可也亦安夫所遇之理而
已必不悖禮妄動以自速咎故湯以七十里文王以百
里不隘夫地惟篤夫道安于所遇卒王有天下而大其
世至于勾踐之棲會稽高祖之王漢中文帝之卻走馬
光武之閉玉關皆見理審勢安于所遇得動靜之幾者

也故能高提霸王之器應時致治功烈著于時而名聲
昭于後貴朝祖宗深見夫此持勤控約不肯少易是以
太祖開建大業國勢方張可以有為而不為太宗丕承
基統國勢益固可以有為而不為真宗親卻大敵國勢
益盛可以有為而不為仁宗治效浹洽國勢益強可以
有為而不為神宗大有以革國勢益新可以有為而不
為高宗坐弭強對國勢不蹙可以有為而不為至德盛
烈輶輶殷殷在人耳目皆有其勢而弗乘安于理而不

妄者也今乃或者欲于遷徙戰伐之極三百餘年之後
不為扶持安全之計欲斷生民之餘命棄祖宗之良法
不以理以勢不以守以戰不以和以惡以一己之勢易
天下之勢收奇功取幸勝為詭遇之舉見手指之瑣屑
忘肩背之擁腫輕泰山而重鴻毛不亦誤乎伏惟陛下
之與本朝初欲復前代故事遣使內交越國萬里徑達
一脈天地人神皆知陛下之仁計安生民之意而氣數
未合兵鋒搶攘小人交亂事體不一雖行李往來徒費

道路迄無成命非兩朝之不幸生民之不幸也有繼好
之使而無止戈之君有講信之名而無修睦之實有報
聘之命而無輸平之約是以藉藉紛紛不足以明信而
適足以長亂至渝合交廣之役而禍亂極矣天祚明德
而有主上轉斗極之氣透永天之春蘊降仁惠以福天
下自謂諸王聖敬日躋即有濟世之心弭兵之意蟠見
藩服延致儒生訪以治道議和止殺期于必行於是語
經于沙陀命經于常山約言于武昌畀書于開平下詔

于江上即位之初過以相與惟恐不及聖度優宏尤為
慈愛樂聞善道篤于濟衆有魏孝文之賢周武帝之義
金世宗之純極其至則三代名君不是過也不知貴朝
何故之以而接納其使拘于邊郡蔽幕蒙覆不使進退
一報兵亂告之以無所歸再報異聞扼之使不能處山
東之事本不相干以為款兵及其降附底裏進見則又
擯而不問累為文移儘自陳說而皆不報一室之內顛
連宛轉不覩天日綿歷數年主上何罪經等亦何罪而

窘逼至是耶夫重兵鋒以相圖者先朝之事也伺釁隙而生事者疆場之吏也推兼愛以弭兵者主上之心也委身命以奉行者經等之義也必貴朝欲以曩時之事行之于今以為主上不當通好經等不當妄來始至境上卻之可也誤于接納逐之可也欲加之罪戮之可也邊將犯邊指為款兵徇而後戮可也必欲錮滯窮蹙使之皇惑自裁不知其罪且有君命亦自不敢也伏惟陛下聖德天縱造道立極存神過化銷鑠大變在位今四

十年享國之永與商周聖王貴朝祖宗並世比隆將使萬物各得其所豈獨于通好使人使至此極乎經等之來一自入境貴朝即有定處況復耆英滿朝俊德在列宰弼陪貳謀之不為不深臺諫侍從議之不為不熟學館髦異貢之不為不多邊閫將帥察之不為不精交際之道故典具在上下井井條綱不紊總萃如一觀本朝之盛衰視本朝之虛實體本朝之強弱酌本朝之可否則經等之事爛乎其觀亦易處也而乃置之舍館數年

不問或者必以為本朝兵亂有隙可乘小信未孚不足
與錄敵有釁不可失也彼之相攻吾之幸也大變之後
是吾大利之日也必有范子語楚子之言以為晉君不
在諸侯而北方可圖祖逖誓江之志擊楫中流以為中
原可定桓溫進取之計灑掃山陵以為函夏可有王玄
謨北伐之說從入橫出以為居胥可封天方祐吾吾可
有為進據山東則河朔可圖檄出關南則燕雲可復直
扼天塹則故京可收沂江而上則兩川可舉以貴朝積

累之盛蓄養生聚三百餘年恢復故疆固所當為辨此
一事儘有餘力固宜不藉使人鼓行而前以為大舉然
而大河南北秦隴東西海岱表裏名城數百縱使本朝
有故委而不問諸鎮侯伯亦未易取中間或有魏太武
斂戍之計縱令入境一旦抄騎百千為羣則或者之論
適足以病國不足以有成其次則不過乘其有故奪據
要害必守之地進取必取之地方其有釁焉問使人闖
隙攻瑕冒利以進縱使得一城取一寨未能償數世之

所失而徒棄二國之明信墮壞禮義之國體結起邊釁
以為背脅疽根則或者之論又足以病國而不足以有
成明矣蓋惟計天下之勢而不計天下之理故也若燕
雲可復則太祖復之矣舊京可圖則高宗圖之矣淮北
可取則寧宗取之矣山東可收則陛下收之矣又豈直
俟今日之有隙而後乘之耶蓋非不能也勢不可也非
惟勢不可也而理固不可也是以祖宗知理之然寧失
之弱而不為強寧失之守而不為戰寧失之棄而不為

取不以地以道不以力以德撫有人民奉安宗祧至于
今而烈烈也故凡天下之事無有出于理之外者以理
而觀得失自見也以理而處勝負自知也以理而行通
塞自見也苟不計夫一定之理而求夫不定之勢欲以
一己之勢而易天下之勢天下之勢卒不可易而一己
之勢自窮未有不貽禍于天下者故熙豐之間有意于
強國美而卒莫能強新法之弊遂至黨人之禍宣政之
間有意于恢復矣百年之力漫費于燕山之空府而因

致復隍之變開禧之間有意于進取矣而隨得隨失反
致淮南之師端平之間再事夫收復矣而徒弊師徒漫
為拾瀋遂失蜀漢是皆貴朝之事且陛下所親見者旁
薄橫潰至于今日以陛下之德勝卒自解弛委餒而去
又可復有為耶而議者不規夫古之理惟徇夫今之勢
不懼夫遠禍惟嗜夫近利但顧一己一時之事不顧天
下後世之事此經所以昧死強僭必言之而不靳也苟
惟徇天下之勢不規天下之理則又必謂遼金夏人吾

見其滅彼今有故氣數可測委如貴朝所報本朝兵亂
異聞等事一皆不妄宜宜遽以為玩本朝立國根據綿
絡包括海宇未易搖蕩太祖皇帝倡義漠北一舉而取
燕遼再舉而取河朔又再舉而滅西夏遂乃掇拾秦雍
傾覆汴蔡穿徹巴蜀繞出大理東西北皆際海而南際
江淮且自周漢以來雄肆勁猛瞰臨中國况又如是之
大且強乎其風俗淳厚禁網疎畧號令簡肅是以夷
夏之人皆盡死力委如所報豈能一向即無君主有中

國以來纔四十餘年豈能一向便至淪棄金源氏既失
燕秦又棄河朔限河以國僅有河南一道猶作一龜茲
貴朝不與之絕者殆二十年本朝縱有一時之變豈可
遽為輕蔑而遂不與乎無金源氏之世讐有金源氏倍
半之勢殆亦未可輕也況復禍亂之際天所以開聖人
也至如所報本朝骨肉睽闕諸侯背叛則或有之以主
上之仁聖必能享國而文治太平豈能遽至是耶夫一
時之禍亂天所以啟主上也日將旦則必有陰沴之翳

龍將飛則必有雲雷之鬱將底于極治則必厭以大難
乾坤而後必繫以屯屯而後終之以履萬物各有其道
而後繫之以泰也故晉有里丕之難而文公以興齊有
無知之難而桓公以霸夏有澆羿而少康以王周有管
蔡而成康以治諸呂所以啟文帝巢隱所以啟太宗宣
獨至於主上使即不幸于禍亂之間乎是無天也至于
所報非惟本朝之不幸亦貴朝之不幸也主上萬安必
能弭兵遂成好事使南北之民免殺戮之禍而共躋仁

壽不然則戰爭方始而貴朝可憂矣事至今日貴朝不
再為報前日之事未可定也則宜汲汲遑遑以應主上
美意講信修睦計安元元而乃仍自置而不問實有所
未解者抑天未厭亂將由是以締起兵端耶抑由是以
別有所蘊蓄耶抑其間有主張是者必不使之成耶皆
不可得而知也竊嘗思之本朝用兵四十餘年亦休息
之時也天畀仁聖而有主上亦治平之世也貴朝受兵
三十餘年亦厭苦之時也保有天命而有陛下亦非生

事之君也即位之初先遣信使輸平繼好弭兵息民置之舍館綿厯歲月久益不問此尤所未解者抑其間有不得已焉者耶抑得已而有故欲不已者耶抑天未許二國之成故令梗踣隔越耶何昧昧如是也必或者之論以為其勢可乘而不顧夫理有以惑陛下者夫南北之勢一定之勢也南之不能有益于北一定之理也理之所在非人力之所能强又非一時之勢可以輒蓋本然不易之道也天下之勢始于北而終于南一氣之運建

于子而居于午動本于靜陽本于陰日北至而陽生南至而陰生屈者信之本也死者生之原也所以死而不厭而為北方之強寬柔以教則南方之強也故凡立國者莫不自北而南也是以周自戎狄遷幽去豳國岐而都豐鎬至于成周則極矣平王東遷于是不能復古蓋自西北而入于東南也秦人自汧渭霸關中并六國最後滅楚亦自西北而始也漢自關中取韓魏梁趙虜項氏于彭城亦自西北而至于東南也至世祖都洛而漢

氏極矣昭烈入蜀輔以孔明之英賢關張之忠勇仗義復漢攻樊城震許都屢出岐山久駐渭濱終不能有關洛一郡孫氏立國江東據三州以虎視天下有陸遜之沈驚呂蒙之謀畫出濡須下皖口攻合肥以戰為守終不能得淮北一民元帝渡江有王導之懿陶侃溫嶠謝安之賢亦嘗經畧中原取河南入關中出彭城勝淝水而山桑代陂枋頭折敗相繼終不能救江汜日車之側當是之時蔡謨之言義之之論最為見理審勢而竟不

見用宋武帝舉江淮之衆平廣固滅姚秦入長安其勢甚張竟不敢登大河北岸而其所得棄不旋踵文帝以元嘉之盛欲恢復河南兩為大舉到彥之敗還而王玄謨退走遂使代馬飲江建康震駭兩淮郡縣赤地無餘春燕來歸巢于林木至于齊梁出入于彭城懸瓠之間爭奪于雍豫青兗之地錯迕紛拂殆無寧歲陳慶之乘魏之亂而納元顥未幾而狼狽以歸梁武帝以妖夢之故思中原牧伯之朝卒自貽侯景之禍祇為揭其本根

而之以召亂是數朝數君者豈不欲帝中華而奄北海哉理不可也見夫勢而不見夫理欲以東南之衆爭衡于西北頓擲人命違易天常是以卒不能有成而自致折敗也夫終南劔門在乎西長淮大江在乎東首尾相呀重險相蔽而天地之形勢定所以隔區宇而限南北也且其土風不同材技不一河朔之人豪勁猛厲長于騎射善于馳逐而重厚耐久故能去國而遠鬪江淮之人剽勇輕疾長于舟楫利于速戰上岸殺敵洗脚入船

故能馮險而善守四海混同南北為一則都無所用苟
為分裂各恃所長好聘不通則宰相折并康節有云自
北而南則治自南而北則亂蓋其氣數使之然也如此
則南北之理天下之勢灼然見矣伏惟貴朝肇基王跡
則自夫燕趙之交一時將相皆幽薊常山之豪傑二祖
功德則著于淮南受命啟土則始于汴宋是以自北而
南也既正皇極平唐蜀滅楚漢自江南至于嶺南則又
自北而南也江淮之間至于閩越戶口滋殖十百諸夏

文物學校盛于上國亦氣數使然應夫萬物相見南方之卦所以開後王而有今日也是亦自北而南也是以太祖不取燕雲真宗不戰澶魏仁宗不伐靈夏高宗不絕金源義理之彊巍巍蕩蕩所以不害其繼三代踰漢唐致治享國之美禮樂文物之盛仁愛忠厚之俗直壯克己之道公普便利之澤正大高明之域結人心固天命非晉宋六朝偏駁雜亂敢望其萬分之一者也蓋祖宗神聖創業垂統深見夫理為一定規模使子孫世守

不敢少有變更踰越一或違之則禍敗輒至是以大本
一定基緒延遠對越上帝光臨大寶至于三百餘年有
漢氏之中微而無漢氏之大亂有李唐之中微而無李
唐之大亂漢氏之有天下四百餘年而唐有天下者幾
三百年自三代以來享國之久不過是也而貴朝則近
踰于唐遠幾于漢漢氏則大綱舉而細目疎故其弊則
禍起于外戚而國竊于大臣李唐則細目舉而大綱頽
靡故其弊則禍起于衽席而位移于藩國貴朝則大綱

正而不類細目舉而不紊漢唐之所以致亂者一皆無之而或有漢唐之中微者何也祖宗交隣之義有時而違之也小違之則小變大違之則大變又大違之則其變有不可勝言者也所以有遷國違難之事不能全有中華校其國勢則反有不及漢唐者且承五季之後元氣蠹蝕契丹西夏已據西北二邊故其國勢頗弱祖宗神聖而能安靖不致力于兵而致力于禮屈已交隣計安中夏故能以弱為強語地語兵則不及漢唐曰禮曰

義則大有以過之故講信修睦弭兵安民不以力為強
弱以禮為強弱者貴朝三百年之命脈也推而行之不
使壅底以玉帛為干戈以使人為將帥行李往來不動
聲氣二國之間迭為賓主其所役不過數十人所費不
過一州之賦一郡之貢而天下帖然是以祖宗以來紆
餘委曲畧其細故而存其大體修飭明信而不敢墜也
非為其勢當然也而理亦固當然也故凡有天下者必
有所事與基圖並立而為一國之盛衰使為國者業業

焉持之而不敢失也奉之而不敢違也修之而不敢怠也其隆平安治則自夫其事之得亂畧阡危則自夫其事之失必由之而莫能去為天下者必謹之而不敢忽也三代以來可以喻貴朝者漢唐而已雖其為治則不同而其享國則相類經所以援擬之而不置也夫母后外戚宦官大臣二漢之事也文武昭宣能謹之是以不能為禍元成桓靈不能謹是以受其禍而莫能違也宮闈藩鎮李唐之事也自宮闈有故而入于藩鎮相因而

然也天皇以來或謹其始而不謹其終或始終俱不能
謹是以病國家禍生人而莫能已也貴朝之建國也家
法之美體統之正治內者甚備御下者甚嚴唐末五季
之弊一皆革之純乎其一王也故母后之聖號為女中
堯舜而外戚不與政宦官不典兵而不殺大臣此又漢
唐之所不敢望與三代可以比隆者也而其所事則在
于邦交之一事關國體繫民命本盛衰乃漢唐之所無
而貴朝所獨有是以祖宗以來曲意勉強要結好援斂

戰國勢維持國體不與校量圖惟安靜與其忿然而舉
萬衆曷若藹然而馳一介一以和議邦交為國此貴朝
之事也夫邦交之事非惟貴朝振古以然至貴朝而後
盛爾經按小雅鹿鳴之三遣使勞使則使人之事前乎
此已有矣又按周官大行人時聘間問歸脤致禮是天
子所以交諸侯也諸侯間于王事則相聘相朝是諸侯
所以交諸侯也周室之衰齊楚秦晉治大行人之事始
重申其辭命致其曲直邦之安危師之利鈍皆繫焉是

列國所以交列國也至于六國締從連衡奉毛遂之盤
進田文之幣合秦趙之車騎搖撼張儀之脣脂而列
國之交極矣至于漢氏遣使四出陸賈唐蒙張騫蘓武
遠至數萬里久至十餘年中國所以交外國也至于蜀
漢吳魏各據一面自帝一方兵之勝負則繫乎交之離
合故其使人往來皆腹心大臣孔明魯肅鄧芝張溫等
皆一時之傑故漢吳一合而勝赤壁漢吳再合而取漢
中吳魏一合而取荊州吳魏再合而勝猊亭當是之時

行人之事益重是敵國所以交敵國也至劉宋元魏裂天下為南北行人往來兵亦不已沈範吉常李彪周邵徐陵庾信等紛紜參錯厯七代二百餘年而離合不一大抵合則俱安離則俱危合則生民受福離則生民被禍至于李唐始舉義師首命劉文静使突厥及其季年內交藩國外聘諸夷疊疊幡幡莫適所定卒償以亡至于五季中國微弱耶律氏起于松漠而復有南北之勢自朱氏篡逆袍笏梅老來聘而高頗報之南北之交始

通晉高祖受其冠帶而事之甚謹南北之勢始定至貴
朝啟運剗平諸僭有沛然混一之勢乃置燕雲而不取
一再傳後遂肆憑陵真宗不免親屈萬乘以幸澶淵寇
準高瓊相與勦力以卻大敵而聖慮深遠不為從綏之
計遂與定盟惴之以天威臨之以大信餽之以重幣示
之以明約而南北之交始定好聘往來甲兵不試安天
下者數十年其後盟約寢弛再侵河朔仁宗則又屈已
信義而富弼遂能負荷復再定盟好聘往來甲兵不試

安天下者百餘年至于宣政盟約遂壞靖康之末因棄
都邑高宗南幸墮讐宗好遂安金源再定盟誓好聘往
來甲兵不試安天下者又數十年而海陵兇虐妄為大
舉以瀆明神而貫盈自斃高宗猶示大信不為追奔遂
與金世宗定盟好聘往來甲兵不試安天下者又數十
年生事之人妄啟邊釁而寧宗增修德政復與章宗定
盟好聘往來甲兵不試安天下者又數十年由是觀之
以交隣為國而能計安天下者莫盛于貴朝也故曰以

和議邦交為國者貴朝之事也天子之所持守大臣之所輔相百僚之所論議以為社稷之大經者惟此而已至于本朝適與陛下相當而陛下使命不一卒無有成蓋本朝方極兵威奄正方國而天未厭亂每為差池是以陛下之聖意不能達祖宗之成規不能合生民之命莫與救藥太和之氣將遂殄絕天地設位必有對待陛下有此意則主上啟此心蓋其氣數亦當然也契丹與貴朝定盟亦數世數十年之後也金源與貴朝定盟亦

數世數十年之後也今主上之世數年數亦金源氏之
世數年數也大定明昌之盛將復見于今即位之初先
遣信使輸平繼好弭兵息民而貴朝置之舍館綿厯數
歲儘自陳說擯而不問故經反復思惟以為必有橫議
之人將以弊貴朝誤陛下者必謂此事于經何有于本
朝何有妨經何事害本朝何事所惜者貴朝之國體陛
下之盛德也此事必行經不過失一身本朝不過失一
臣太倉耗一粒滄海揚一波鄧林飄一葉泰山落一石

于國何損至若貴朝所舉皆中圖惟皆獲返舊京奄山
東取河朔平關中刻白溝之界上盧龍之塞而本朝亦
不失故物若為之而不成圖之而不獲復欲洗兵江水
掛甲淮壖而遂無事殆恐不能一有所失則不既大矣
乎且貴朝光有天下三百有餘年矣盛治洋溢大業崇
極方當白日之正中不趣義和之馭可也將安將樂恬
處易守不自搖動可也不棄其輔負于其輻以固皇輿
可也經聞貴朝廣西帥臣以交趾之變有言曰國家紀

綱正君臣和百姓安若其有故天亂宋也宋不亂而經
每為稱道蓋有國者不畏夫有亂畏夫自致其亂自致
其亂則人也橫逆而來則天也天欲亂人之國其如彼
何哉盡其在我者而已已無所致都所不計也已自致
之覆亂不暇也經嘗以為養生之術足以為壽國之道
人之一身制嗜欲者心志也固筋骸者血氣也為資養
者飲食也為節宣者起居也故起居以時飲食以節血
氣周流無有壅隘心志安強無有沮撓則一身安而可

以有為矣在童穉時則致夫童穉之事壯盛之時則致夫壯盛之事耆艾之時則致夫耆艾之事矯揉于顓蒙之際騁騫于方剛之年存養于耆艾之日以引以佚則可以延出年數之表而無札瘥夭折之患苟怠忽恣肆不知理身之道拂其心志勞其血氣飲食不以節起居不以時誑幼子以不常賈餘勇于中年肆侈侈于衰暮往往損其天年自致中下之壽故省事者養生之本生事者傷生之源由穉以壯由壯以衰由衰以老由老以

盡理勢然也少不為壯者之事老不為少者之事亦理勢然也善養生者循夫理而已夫為國者亦然啟基圖者道也結人心者義也維持統體者紀綱也培植本根者風俗也創業之時則為創業之事守成之時則為守成之事寢明寢昌之時則為寢明寢昌之事寢微寢弱之時則為寢微寢弱之事開國創制于建極之初張皇宗飭于盛明之日擁衛固護于微弱之時亦猶人之一身相其年數而時其所為老不為壯而穉不為老故其

取以治治以安安以久強不為弱弱不為強亦本然之理也都無所逆而一順夫理則世卜可踰祚胤可求而無覆敗自絕之禍矣苟失道廢義為于不可為之時可為之時而不為禍敗之事咸其自取可以盛大蕃昌傳世永久而自致傾覆亦理勢然也故周過其厯秦不及期善為國者亦循夫理而已伏惟貴朝道盛德至無疆惟休累聖奕葉瓜瓞綿綿昭宣重光賁若草木然而以理而推傳世厯年既盛且遠殆如龐厚者父之人精通

事變練歷多故義理之強混涵亢矯精神折衝久而益壯然而血氣則衰矣政爾具膏粱奉酒醴供藥餌湛靜簡默深居高拱以壽國脈而固天命之時也或者乃欲添足于蛇置魚于木委棄廟算經營野謀進廉頗之米肉觀馬援之雙鑠獎厲亢國牽率陶侃與新進少年力競一時雖方叔元老克壯其猷方之萬全坐勝應時居易不既背馳左顧有以誤天下國家乎夫往歲交廣之師渝合之變武昌之役是天所以大警于貴朝深眷于

陛下也備禦嘗疎缺矣因是而申治精緻圖惟嘗簡緩
矣因是而密勿深切玩易者因是而畏難恣肆者因是
而斂戢怠者激之而于是乎悚以壯懦者逼之而於是
乎強以力如器之方弊且漏因是而湘濯釘錮如事過
之後不為生事以求夫異要結好援蔽之以信蘓潤瘡
痍鎮之以靜閑闕息商以待元氣之復求吾之所以未
備者于內不求夫所以不當為者于外本夫理而不徇
夫勢則景定之元乃建隆之初也周漢晉唐之中興者

再貴朝則至是而三也詩所謂周雖舊邦其命維新者不止與文王復見於陛下而或者乃徇夫一己之勢徂于一時之利不思天之所警欲于大變之後抵巇投罅拘滯使人而別作為舉祖宗三百年之成烈再為博者之一擲遂以干戈易玉帛殺戮易民命戰爭易禮義苟得志焉而都所不恤果能必無誤乎貴朝有國以來隣並之間得失之故不為不多矣利病可否不為不熟矣勢之當然而理之本然不為不久矣不待監之他人皆

可自監也國步萬折一安一危至于今日而復可為是
耶陛下聰明睿智彰往察來周乎萬物而不過濟于天
下而不遺可以進則進可以止則止得聖人之時顧豈
從此以危二國蓋有不得已焉者誕妄迂疎之輩徼功
生事之徒偷貳苟且之人自用怙亂之士蝟起橫議相
與沮撓經等如鹿衆為犄角雖天子仁聖宰相賢明鑠
金之言不可奪也誕妄迂疎者則無有遠慮不識時務
敢為大言高論視天下之事皆不足為自以為子房孔

明復出也翹然自喜惟欲多事已不能持寸刃惡人之
不復讐已不能取尺土惡人之不恢復笑夫登牀告病
而勇于背城借一聞其欲和則忿然而怒即指為秦檜
之流必為之梗沮而使之不行徼功生事者則不知國
家長久之利惟以爵賞為志今日一戰可以進某階明
日一出可以掇某職是以以敗為勝以怯為勇不用其
所長振暴其所短倖而俘獲則列上首虜多張其數不
幸而一僨委地使生靈肝腦盈野塗城則恬不為怪若

已無所與聞其欲和則曰卷甲休兵置吾徒于何地必
為之梗沮而使之不行偷貳苟且者則脂韋阿諛不與
負荷固陋營寵惟恐其失幸其得爾儘自遷延有少利
害輒遽推避或以為當和則曰姑為接納其使或以為
當戰則曰姑為命將出師至于兩相背戾則曰姑兩廢
置稽誤日深畏難日重則惟恐陛下聞知而益為絀鉅
必為之梗沮而使之不行自用怙亂者則喜同惡異樂
為徼倖某等之來倡義拘留始焉觀變中則待變既而

一切差池而無以應變則曰事勢若此與之絕亦戰與之和不戰執其使無以已其兵而終當與之戰始可以和不為之應自致其禍而歸咎於人再起兵端不自悔悞棄疾於某益為誣染必為之梗沮而使之不行是特橫議相與沮撓者而已二國之間誤國欺君又有甚者焉彼間探造鑿之人反復姦宄之徒是也夫間探造鑿之人大抵皆為弱彼強此之說以取容悅又惡知夫國家利害生民休戚哉必曰彼方有故彼必亂彼骨肉

必離彼臣子必叛彼民思吾君彼必慕吾化彼之輸平也偽彼之命使也詐彼畏吾而為是彼款兵而為是彼不足與吾可折箠長驅而取之矣聞之者必喜而必信夫反復姦宄之徒尤所以誤二國而深禍本也或得罪於北而遁死於南或得罪於南而遁死於北一旦乘機投會蔽匿以進而重為交亂懷鬼蜮之計扇迎合之辭苟可以得志而無所不為竒發陰中巧為營惑與夫所謂誕妄迂疎微功生事偷貳苟且自用怙亂間探造鑿

者焰焰而颺煽哄應而翕合前者倡于而後者和喁其
勢可以回天轉極挂南斗于天山潑湖湘于瀚海決江
漢之波以洗濯天下雖陛下神聖特立獨行斷然不惑
亦未能有以卻彼經所謂然彼則以為不然經方反復
其辭以自明彼則倍蓰其誣以必壞所以誤經之事至
于今日譎張為幻皆此輩也彼誕妄者大言惑上掇撫
仕擅榮耀而自肆矣微功者積勞累多位上將綰侯印
而自得矣偷且者容身苟簡遠得失持兩端而自便矣

自用者文過重怒肆強執安殘忍而自若矣造鑒者取
重賞獲厚祿而自營矣姦宄者戢羽翼俟風颺而自恣
矣四海之內被無窮之禍者兵民也二國之間蒙連遭
之難者某等也九重之內貽社稷之憂者陛下也抑將
終從彼之言而必為乎抑亦將采芻蕘之論舍彼而從
此乎昔富鄭公奉使契丹謂契丹主曰和則利歸國家
福及百姓不和則利歸將帥而禍于國家契丹主大悟
于是定盟蓋理到之言不得不從也貴朝祖宗良法美

意一主於和維持宗社以及于今豈可行之外國而不行之本國使此輩一時得志快意以害二國而種無窮之憂哉此其所以誤陛下之甚者也非惟誤之於陛下而又誤之於經等非惟誤之於天下而又誤之於後世經所以熟數亟論而莫能已也經等布衣教授保塞主上聘起問以治道即以議和止殺為請其後對揚之間敷陳不一是以即位之初先遣信使即命經行入境以來綿歷四年凡有蘊蓄無不傾盡經實何人敢如此過


涉猛浪與人家國事蓋不敢欺天不敢欺君不敢誤國
家不敢誤天下後世已然之事則既備言矣未然之事
亦既先言矣將然之事亦既亟言矣本朝之事無不盡
言也貴朝之事無不僭言也兩朝之事無不並言也先
朝之事無不兼言也推本一世之利害究竟萬世之利
害無不欲貢之貴朝以成好事也抑之而其氣愈厲挫
之而其志愈堅闕之而其辭愈切經之所以不負於國
而忠於君者惟此焉在經等今日之事止是告登寶位

布弭兵息民意其餘無他蔽匿必貴朝以為不可必不能從何用置經於此下一明詔數其好事難成之故梗礙牽制之由稽留使人不為無故或別有蓋藏之跡明白指陳使天下四海知本朝之所以命使臣而欺貴朝貴朝之所以留使人而責本朝至若貴朝所報本朝兵亂異聞等事一皆不妄今皆數年長淮以北一切事勢必皆非曩時通好使人亦宜區處或貴朝終于疑阻已別遣使無用經等亦宜賜一明降或欲與本朝校量疇

昔必決勝負一主于戰通好使人尤為無用而乃仍自
拘留擯而不問陳說不答表請不報差官不從告歸不
許老天長日寢以銷鑠必自斃館下經等之辱固自遺
臭通好使人至于如此亦非貴朝美事所以惶惑無聊
而又致夫此也墜乎千仞之下仰天而呼高下疾徐都
所不知過之者睨而不視聞之者掩耳而走彼橫議反
復之徒必又瞰臨而下石惟恐其不忠也區區使人不
足忌惡陷誤至今而猶不已必使之死而不出二國之

民靡有孑遺然後為快也夫天下之大忌必出於所不忌但恐貴朝之事不在於好生之君講信之臣和氣致祥乖氣致異有意慮之所不及者伏望陛下奮乾綱操獨斷以大禹之智行其所無事體主上之本心閔經等之愚昧本夫理而不徇夫勢以天下為度以生民為念卻夫橫議生事反覆誤國之言用夫祖宗導迎和氣愛利之道畀經以二國之事使經展布四體披露一心有不負陛下者今氣數將周甲子改元政二國連續維

新之日也雖誤之於始不誤之於終主上行之於北陛
下成之於南經等數年之戚一旦得信則事體仍在釁
雖積而可消兵雖交而可弭億萬之性命可存挽回元
氣春動諸華天地人神之福也觸忤聖聽不勝戰懼之
至秋律西成伏願對時育物大庇生民允屬虛望使臣
郝經等昧死再拜上大宋皇帝闕下



陵川集卷三十九